

舊唐書逸文

舊唐書逸文卷三

甘泉岑建功

元宗紀上

先天二年

先天中元宗以早親往龍首池祈禱有赤虵自池中而出雲四布應時澍雨

御覽九百二十九 冊府二十六元宗作帝池下無中字雲下有霧字係先天二年三月甲戌事

先天二年丁未江州獻靈龜六脾腹下有元文象卦文
御覽九百三十一 冊府二十四丁未作八月

先天中有王知道母患骨蒸醫云須得生人肉食之知道遂密割股上肉半斤許加五味以進母食之便愈

御覽三百七十五 冊府一百三十九王上有司奏孝子四字
進母下仍有母字愈下有卽託他疾臥不令母知州縣以狀聞
宰相請賜束帛帝曰宜與一官以旌孝行三十字係先天二年
事惟未言何月今姑列於是年之末

開元二年

開元二年紫微舍人六員每一頭商量事諸舍人同押連署狀進
訖凡事有是非理均與奪人心旣異所見或殊抑使雷同情有不
盡臣今商量其事執見不同者望請別作商量狀連本狀同奏若
狀語交爭恐須聖思臣旣是官長望於兩狀後略言二理優劣奏
聽進止則人各盡能官無留事勅曰可

御覽二百二十 會要五十五紫微下有令姚崇奏中書六字
頭作人訖作說今作令其事作其大事別作便同奏作同進

作互須作煩係是年十二月二十日事

七年

開元七年大拂涅靺鞨獻鯨鯢睛

御覽九百三十八 冊府九百七十一 靺鞨作靺鞨獻上有遣使二字睛上有魚字下有貂鼠皮白兔貓皮七字係是年八月事

八年

元宗時國子司業李元瓘上言三禮三傳及毛詩尙書周易等並聖賢微旨學人教業必事資經先聖雖遠斯道不墜今明經所習務在出身咸以禮記文少人皆競讀周禮經邦之軌則儀禮莊敬之楷模公羊穀梁歷代崇習今兩監及州縣以獨學无友四經殆絕既事資訓誘不可因循卽望四海均習九經該備從之

御覽六百八 會要七十五引此奏學人作生徒先聖雖遠作
違則斯道作斯文崇作宗無既字循下有其學生望請量配作
業并貢人參試之日習周禮儀禮公羊穀梁並請帖十通五許
其入策以此開勸三十九字係開元八年七月事通典十五與
會要同惟生徒作生人望請作請停各習上有凡字入策作入
第冊府六百三十亦與會要約同惟競讀作諳讀望請下有各
字參試作預試

九年

開元中許昌縣之唐祠掘地得古銅罇又隱起雙鯉篆書文曰宜
子

御覽八百十三 冊府二十四許上有于字又上有上字子下
有孫字係開元九年二月事

十二年

開元十二年太原獻異馬駒其耳如筒左右各一十六肋肉尾無毛

御覽八百九十五 冊府二十四同係是年五月事

開元十二年宋州獻古銅鼎十九及鍾磬甗釜罇杓盤瓶各數四時宋城尉晉日休因版築獲而獻之

御覽八百十三 按此事未詳何月姑列於是年之末

十三年

開元十三年撫州三脊茅生石頭

御覽九百九十六 冊府三十六無石頭二字係是年四月乙

丑事

開元十三年河南府壽安縣人劉懷家有大麥六畝先熟與衆麥

殊色其中有兩岐三岐四岐六岐者

御覽八百三十八 冊府二十四紀壽安縣瑞麥事在是年五月甲申

開元十三年兗州奏白雀見景戌上謂宰臣曰往者史官維記災異將令王者懼而循德故春秋不書祥瑞唯記有年聖人之意明矣勅天下諸州府不得更奏祥瑞

御覽九百二十二 冊府二十四敘此事在九月會要二十八無兗州奏白雀見六字上下有又字者作昔維作惟災作災循作修唯作惟勅上有遂字州下無府字係九月十三日事 按新畫元宗紀及通鑑叙止奏祥瑞事皆在九月丙戌御覽丙作景者蓋沿唐史避諱之文

十四年

元宗有五色鸚鵡能言育於宮中上命左右試牽御衣鳥輒瞋目叱咤岐王文學熊延京因獻鸚鵡篇以贊其事上以鳥及延京詩示百寮尚書左丞相張說上表賀曰伏見天恩以靈異鸚鵡及熊延京所述篇出示朝列臣按南海異物志有時樂鳥鳴皆云太平天下有道則見臣驗其圖丹首紅臆朱冠綠翼與此鸚鵡無異而心聰性辯護主報國故非常品凡禽寶瑞經所謂時樂鳥也延京雖敘其事未正其名望編國史以彰聖瑞

御覽九百二十四 冊府二十四元宗有作帝至自汝州之溫湯時有兩熊字皆作能四京字皆作景上以作帝以皆云作皆曰太平在天下二字下辯作辨報國作報恩樂上無時字敘作識瑞下有許之二字係開元十四年十月己巳事又八百四十四同惟篇作賦實作寶 按元宗紀開元十四年十月庚申幸汝

州廣成湯已已還東都此條當次於其下

元宗幸富王憲宅與諸王宴探韻賦詩上詩曰曾衛情先重親賢
受轉多冕旒豐暇日乘景暫經過戚里申高宴平臺奏雅歌復尋
爲善樂方驗保山河

御覽五百九十一 冊府一百十上作帝受作愛係十四年十
一月已丑事又卷四十但云十一月一百十三則云十一月丁
巳賦詩下並有卽日還宮四字英華一百七十五受亦作愛驗
作念

十六年

開元中勅所選皇太子及諸王等妃旣是百官子女禮合避人今
遣就本縣及過本司未爲得所其應預妃者宜令所司具名錄奏
各令女及近親隨使於命婦朝堂待進止

御覽一百四十九 會要卷四遣作追本作府係開元十六年

五月事

十九年

開元十九年楊州奏穡生稻二百一十五頃再熟稻一千八百頃其粒與常稻無異

御覽八百三十九 八百七十三同異下有穡音旅三小字

會要二十八無五字係是年四月一日事 冊府二十四與會要同惟一日作己卯

二十年

開元二十年有一角神羊產於京兆之富平縣肉角當頂白毛上捧識者以獬豸名之

御覽八百九十 冊府二十四神羊作獸無產於京兆之富平

縣八字以獬豸名之作以爲獬豸係是年三月事

元宗開元二十年自東都幸太原至太行坂路隘逢輦車問左右曰車中何物左右奏曰禮天子出則載輦車以從先王之制也上曰焉用此命焚之無輦自此始也

御覽五百五十一 會要二十七脫逢字無輦作天子出從無輦車係二十年十月十二日事 按新書元宗紀是年十月壬午如潞州舊書元宗紀是年十月辛卯至潞州之飛龍宮通鑑是年十月壬午上發東都辛卯幸潞州辛丑至北都冊府一百十三是年七月甲辰制曰宜取今年十月十二日幸北都十月壬午駕發東都北巡辛丑至北都以諸書參互考之十月壬午卽十二日乃發東都之日非至太行之日也由東都以至潞州必由太行元宗之至太行當在壬午之後辛卯之前

二十一年

開元二十一年衢州獲魚有銘獻之侍中裴光庭等奏曰魚龍爲圖河洛所出比之盛明彼何足云

御覽九百三十五 冊府二十四衢上有二月二字奏曰作奉賀無魚龍以下十六字 事類賦注二十九明作時

二十二年

開元二十二年十一月制宰相兼官者並兩給俸祿

御覽二百五 會要五十三上無二字一作二相作臣考舊書元宗紀無此事二十年十二月尙載它事而二十二年十一月全無一事今姑從御覽

元宗紀下

二十五年

元宗時御史大夫李適之奏每大禮六品宜並服朱衣自是以下許通著袴褶如有慘故不合著朱衣袴褶者聽不入自餘應著而不著者請奪俸以懲不恪

御覽六百九十五 冊府六十載此奏每下有當正至及緣五字六品宜作應朝官并六品清官自是以下作餘六品已下許上有望字故下有准式二字聽不入作其日聽不入朝應下有合字俸上有一月二字係開元二十五年十一月丁亥事 會要二十四每當正至作每至冬至應朝下有參字許上無望字餘與冊府同亦在開元二十五年通典七十四與會要同惟每當正至作每至冬正不恪下有制曰可三字亦在開元二十五年全唐文三百四與冊府約同惟每上有臣伏以朝服準式皆合備具比來有稱慘故式致乖疎臣望自今已後二十七字如

上有朔望日請依舊文武官朝集使並服袴褶十六字不著上無而字一下無月字格下有其蕃官望不在此限如情愿著者請聽餘望依今式二十字

開元中上命官中養蠶親自臨視欲使嬪御已下知女工之事及蠶罷獲絲甚多因以賜焉

御覽八百二十五 按此條但言開元未言何年今姑列於開元之末

天寶元年

天寶中隴右節度皇甫惟明奏龍支縣人庫狄孝義有馬生龍駒經九旬有九日身有鱗而不生毛臣就檢視時有慶雲五色遙覆馬上久而不散伏望宣付史官以爲實錄從之

御覽八百九十五 事類賦注二十一伏望至從之作請付史

官 冊府二十四爲作光係天寶元年六月乙未事全唐文三百五十七載此奏爲亦作光亦以爲天寶元年惟明官隴右節度使時所上

天寶中益州獻三熟蠶厚白淨與常蠶不殊

御覽八百二十五 冊府一百六十九厚作繭繁常作春係天寶元年九月事

二年

天寶二年正月二十八日築神都羅城號曰金城

御覽一百九十二 會要八十六同

三載

天寶中升社稷五星爲大祀詔曰祭之爲典以陳至敬名或不正是相奪倫况社稷字祐百代蒙其福日月照臨五星協其紀兆庶

允殖下土式瞻旣超言象之外須極尊嚴之禮列爲中祀頗紊大猷自今已後社稷及日月五星并升爲大祀仍以四時致祭

御覽五百三十二 會要二十二節引此詔并作並致祭下有諸星爲中祀五字係天寶三載二月十四日事冊府三十三照作炤并作竝致祭下有諸星升爲中祀庶昭報之誠格於上下欽崇之稱合於典則二十三字係天寶三載三月戊寅事 按以新舊書元宗紀考之天寶三載閏二月正月朔係丙申二月三月均得有戊寅當存以俟考

五載

天寶中詔曰朕頃者所撰廣濟方救人疾患頒行已久傳習亦多猶慮單貧之家未能繕寫間閭之內或有不知儻醫療失時因致天橫性命之際竄亡惻隱宜命郡縣長官就廣濟方中逐要者於

大板上件錄當村方要路榜示仍委採訪使勾當無令脫錯

御覽七百二十四 會要八十二節引此詔無頃者二字宜命作宜令逐要者作選其切要者於大板上件錄作錄於大版上當村方作就村坊榜作榜係天寶五載八月事冊府一百四十七引此詔頃下無者字傳上有計字醫作將天橫作橫天亡作忘宜命作宜令村方作村坊全唐文三十二與冊府同惟將療作醫療

六載

天寶六載十二月築會昌城於湯所置百司及公卿邸第

御覽一百九十二 會要八十六月下有一十一日四字通鑑敘此事在是年十二月壬戌 冊府十四築上有發馮翊華陰等郡丁夫九字會昌下有羅字湯所作溫湯無及公卿邸第五

字

八載

天寶八載九月甲午是月皇太子生日上製仁孝詩六章親書於步障以賜太子令中官高力士以示朝臣

御覽五百九十一 冊府四十上作帝親書作札又二百六十一並同其下文俱載李林甫等請頒示中外之奏文

九載

天寶中華陰郡奏白鶴見於西嶽五福峯

御覽九百十六 冊府二十四同係天寶九載二月壬寅事

十載

天寶中中書門下奏曰臣等今日因奏事承德音聞江南爲橘江北爲枳蓋以地氣有殊物性因變朕近於宮內種甘子樹數株今

秋已來結實一百五十顆乃與江南及蜀道所進無別亦可謂稍異也

御覽九百六十六 事類賦注二十七書下無門下二字臣下無等今日因奏事六字甘下無子樹二字秋下無已來二字百上無一字蜀上無及字別下無亦可謂稍異也六字 冊府三十七近下無於字甘作柑已作以五下無十字也作者係天寶十載九月事

天寶中詔曰禮神以玉者蓋取其精潔表裏溫潤合德爲器有象正辭乃信以達馨香其在璧頃來禮神六器及宗廟奠玉自馮紹王奏後有司並皆用珉禮所謂君子貴玉而賤珉是珉不可用也朕精禋郊壇嚴敬宗廟奉惟新之祚庇太平之人則神力普存備物以享安可以珉代玉惜費事神況國家之富有萬方之助祭闕

典必修無文咸秩豈於天地宗廟奠玉有虧自今已後禮神六器宗廟奠玉並用眞玉諸祀用珉如以玉難得大者置小其制度以取其眞

御覽八百五 冊府三十三裏作心璧上有珪字王作正並皆作竝不可上無是珉二字神力作人力富作祈福禮神作乾坤係天寶十載十一月壬午事全唐文三十三與冊府悉同會要二十三節引玉下無者字蓋作奠精上有誠字裏作心王作貞司下無並皆二字不可上無是珉二字已後作以後小其作小具

年月無考

元宗親製春臺望四章二十八句起居舍人蔡孚奏曰伏見所製氣雄詞美德音相屬鄙炎漢之奢侈徇有唐之儉陋知作勞而居

逸念中人之家庭用心如此天下斯安臣職在司言請宣示百寮及編國史

御覽五百九十一

端午日元宗自賦詩曰端午臨中夏時清日復良鹽梅已佐鼎麴蘖且傳觴事古人留迹年深縷續長當軒知種茂向水覺蘆香億兆同歸壽羣公共保昌忠貞如不替貽厥後昆芳

御覽五百九十一

元宗製令長新誠一篇頒賜天下縣令其詞曰我求令長保乂下人人之所爲必有所因侵漁浸曠賦役不均使彼離散莫保其身徵諸善理寄爾良臣與之革故政在維新調風變俗皆僞歸真教先於富惠恤於貧無大無小以躬以親青旌勸農其唯在勤墨綬行令孰不攸遵曷云被之我澤如春

御覽五百九十一 全唐文四十一 曠作廣使彼作使夫維新作惟新於富作爲富以躬以親兩以字俱作必青旌作責躬
元宗紫宸殿櫻桃熟命百官口摘之

御覽九百六十九

肅宗紀

天寶中安祿山自范陽入朝肅宗觀其兇恣有悖逆之狀言之於太上皇太上皇易之不納上恐危社稷遂精誠祈夢其夜夢故內侍胡普寂等三人持按覆以黃帊自天而下至上前有素版丹書文章甚多既寤所記者唯四句曰厥不云乎其惟其時上天所保福祿不虧十四載十一月甲子祿山果於范陽稱兵向闕

御覽三百九十八 冊府二十一天寶至社稷作天寶十三載

觀安祿山有悖逆之狀恐危宗廟普上無胡字三人持按作二

人昇一紫按杷作帕至上前作直至帝前素上無有字章作字
無十四以下十八字 案肅宗紀云天寶十三載正月安祿山
來朝上嘗密奏云祿山有反相元宗不聽此條蓋彼處逸文
肅宗至平原郡路傍遇一伏兔命左右索弓箭因謂左右曰吾若
破賊射則中之不然則否一發而斃左右咸稱萬歲

御覽三百二十九 冊府二十一 原作涼據新舊書肅宗紀及
通鑑皆言天寶十五載六月辛丑至平涼郡此條當補於其下
蓋是月潼關失守元宗幸蜀肅宗將往靈武而路由平涼也若
平原則遠在關東河北非當日所經之地當從冊府

至德元載

至德中肅宗降誕之辰有慶雲屬天白鶴飛舞於上所居殿宇翽
翽三十餘匝而去

御覽九百十六 冊府二十五肅宗作帝三作二係至德元載
九月三日事

至德元年制諫議大夫論事自今已後不須令宰相先知

御覽二百二十三 新書肅宗紀敘此事於至德元載十月癸
未通鑑同通典二十一作九月

二載

朔方節度郭子儀言朔方縣界荒地廣十五里有黑禾穀出遍地
每日附近百姓掃盡經宿還生前後可得五六千石其禾圓實味
甘美臣以爲天啟興王先瑞百穀故漢稱雨粟周頌來麇豈若瑞
禾自出家給人足蓋陛下富教安人務農敦本光復社稷康濟黎
元之應也

御覽八百二十九 冊府二十五言作奏附作側先瑞作瑞先

豈下脫若字農作豐也下有臣不勝大慶五字係至德二載七月事全唐文三百三十二與冊府同

乾元元年

肅宗時司天韓穎奏五官正其官配五方臣請冠上加一星衣從方色

御覽六百八十四 會要三十一司天作知司天臺事其上有奉勅創置四字官下有職字臣上有上稽五緯四字星下有珠字方色作本方正色下有每至元日冬至朔望朝會及諸大禮卽服以朝見仍望永爲恒式勅旨依二十八字係乾元元年十月一日事又四十四引畧與此異全唐文四百三十二通典五十七載奏文與會要三十一全同惟每至元日冬至通典作每至正冬但云元年十月未著何日通鑑載乾元元年六月山人

韓穎改造新歷穎卽於其時知司天臺事此奏在是年無疑

二年

乾元中虢州刺史王奇光奏閩鄉縣界女媧墳天寶十三載大雨晦暝失所在今河上側近忽聞雷風聲曉見墳踴出上有雙柳樹下有巨石柳各高餘丈畫圖進上以示百官

御覽九百五十七 事類賦注二十五閔誤作閩縣下無界字失上有忽字今河上側近作至今河側雷上有河中二字墳上有其字踴作湧無柳各以下十三字 案五行志所載事同而文異在乾元二年六月會要五十九閔上有所部二字兩墳字皆作墓天寶至今作天寶失所在今月一日夜雷下無風字見下有其字踴作湧柳各高餘丈作其柳各高丈餘無畫圖以下八字係乾元二年六月十八日事 又案新書五行志敘此事

在乾元二年六月乙未

乾元中李輔國奏內飛龍殿鑄銅鍾投乾元新錢二文於鑪中而
祈曰如聖躬萬福國祚無疆兇孽殄除四方甯謐則願不銷不鑠
一陰一陽並見於外鍾成一如所祈

御覽八百三十六 事類賦注卷十鑪作鑪鑠作鑠 案事類
賦注唐書下有記字疑紀字之訛紀上仍當有肅宗二字 又
案乾元建號首尾三年以肅宗紀考之元年七月丙戌初鑄新
錢文曰乾元重寶二年九月戊辰新鑄大錢文如乾元重寶而
重其輪但輔國奏鑄鐘事未知定在何年今姑附諸乾元二年
之末

上元元年

上元中制定禍亂者必先於武德拯生靈者諒在於師貞周武創

業克雷區夏惟師尙父實佐興王況德有可師義當禁暴稽諸古
昔受崇典禮太公望可追封爲武成王有司依文宣王置廟擇古
今名將置亞聖及十哲享祭之典一同文宣

御覽五百三十五 會要二十三周上有昔字太上有其字擇
上有仍委中書門下六字置上有准文宣王四字哲下有等字
文宣下有王字冊府八十七實作寔太上有其字擇上有仍委
中書門下六字置上有配享并三字哲下有等字二書均言上
元元年閏四月十九日事又冊府三十四引與會要同惟十九
日作己卯通典五十三無定禍亂以下十八字業下無克雷二
字餘與會要同但云在閏四月 案肅宗紀是年閏四月己卯
追封周太公望爲武成王依文宣王例置廟此條當是彼處逸
文禮儀志四所載與此條事同文異亦云上元二年閏四月二

年蓋元年之誤新志肅宗紀及通鑑敘此事皆在上元元年閏四月己卯

二年

肅宗性節儉嘗出衣袖示近臣曰此衣已三浣矣

御覽六百八十九 八百二十六節儉作儉約嘗上有衣服無綺繡五字近臣作韓擇木此衣作朕浣作澣 事類賦注十二袖上無衣字三上無已字矣作也 冊府五十六敘此事在上元二年八月

代宗紀

寶應元年

寶應元年秋七月己卯京兆府萬年縣獲三足烏獻之

御覽九百二十 冊府二十五無秋字

二年

竇應初禮部侍郎楊綰奏請每歲舉人依鄉舉里選察秀才孝廉
勅公卿以下集議中書舍人賈至議曰楊綰所奏實爲正論然衣
冠遷徙人多僑寓土居鄉土百無一二今依古制恐取士之道未
盡今禮部每歲擢甲乙之科祇足長浮薄之風啟僥倖之路矣其
國子博士等望加員數十道大郡量置大學館令博士出外兼領
郡官召致生徒依乎故事保桑梓者鄉里舉焉在流寓者庠序推
焉如此則青青不復興刺擾擾由此歸本焉勅旨每州歲察孝廉
取在鄉間有孝悌廉恥之行薦爲秀才有司以禮待之試其所通
之學五經之內精通一經兼能對策達於理體者並量行業授官
御覽六百二十九 會要七十六勅下有令字啟作開由此作
由其歲察上有每字薦爲秀才作薦焉有司上有委字理體作

治體授官下有其明經進士並停道舉亦宜准此况所司作條件處分二十一字係寶應二年六月二十日事通典十五及冊府六百四十年月與此同但未言何日冊府並載綰奏及賈至議文通鑑紀此事則在廣德元年六月癸酉英華七百六十五載賈至議與全唐文三百六十八約同云在代宗寶應二年六月舊書楊綰傳及賈至傳並載至議綰傳無年月至傳亦在寶應二年議文與冊府諸書所引約同皆較此條爲詳此條蓋節舉其大旨耳下條仿此 案代宗紀寶應二年秋七月壬子改元曰廣德據此則是年六月以前尙未改元當作寶應二年爲是通鑑之例以後改之元爲主故與本紀互歧耳 又案禮儀志四與此條事同文異故定爲代宗紀逸文

寶應初禮部侍郎楊綰奏貢舉條孝廉各令精通一經其取左氏

傳公羊穀梁禮記周禮儀禮毛詩尚書周易任通一經每經問義二十條皆取傍通諸義務窮根本試策二道問古今理體及當時要務取堪行用者仍每日一道三道畢日經義及策全通爲上第其上第者望付吏部便與官其問義每十條通七策通二爲中第與出身下者罷之又論語孝經皆聖人深旨孟子亦儒門之達者其學官望兼習此三者共爲一經其試如上秀才舉望令精通五經問義二十條對策日試一道全通者爲上第送名中書門下請超與處分問義十條通七策通兩爲中第中第者送吏部與官下者罷之孝悌力田但能熟讀一經言音典切卽令所司舉送試通便與出身今年舉人或舊業旣習理難速改或遠州所送身已在途事須收獎不可中廢其今秋舉人中有情願依舊舉業者亦聽今年之後一依新格勅旨進士明經置來日久今頓令改業恐難

有其人諸色舉人宜與舊法兼行

御覽六百二十九 會要七十六奏貢舉條下有目曰二字傍作旁試策二道作試格策三道理體作治體時要作今時仍每日下有問字三道畢日作類三日畢上秀才舉下有人字日試一道作五道通兩作通四便與作使與今年上有其字既習作既成新格作新勅恐難下無有字係寶應二年七月二十六日事冊府六百四十則作廣德元年七月條下亦有目曰二字餘所載與全唐文三百三十一悉同楊綰傳載此奏及上條賈至奏而未著明何時據通鑑此奏在廣德元年七月戊辰 案代宗紀寶應二年七月壬寅朔壬子改元曰廣德則戊辰乃是月二十七日既在改元之後則當云廣德元年不當云寶應二年今姑從御覽 又案禮儀志四與此條事同文異故定爲代宗

紀逸文

廣德二年

代宗時禁民皂衫壓耳帽以異官健

御覽六百八十七 冊府六十四作王公百官家及百姓著皂衫及壓耳帽子異諸軍官健也係廣德二年二月事

太尉李光弼御軍嚴峻而有禮士卒望風畏憚乾元中郭子儀會九節度之師不利於相州詔以光弼代子儀爲河北副元帥子儀寬恕朔方將士多不奉法時僕固懷恩引回紇內助累立戰功將帥多假借之及光弼統師懷恩爲右廂都知兵馬使光弼出關會諸軍於汜水左廂都知兵馬使張用濟後至斬於纛下懷恩見而憚之不敢惕息光弼在河陽令懷恩攻泰清於懷州官軍頻不利光弼怒將斬之懷恩出奇爲地道偷得賊號詐傳號令賊軍大亂

遂拔懷州擒泰清而還光弼捨之泰清妻有美色城破被俘泰清
光弼求之卽命還泰清議者稱自艱難已來唯光弼行軍理戎沉
毅有籌略將帥中第一

御覽二百七十七 案李光弼傳與此條迥異疑此條仍代宗
紀廣德二年之佚文蓋是年七月已酉光弼薨於徐州此條乃
撮敘其生平之語也 又案據光弼傳泰清當作安太清據文
義光弼求之上當有脫字

永泰元年

永泰元年秋京兆府上言鄠縣嘉禾生穗長一尺餘穗上粒重疊
如連珠

御覽八百三十九 冊府二十五鄠作鄂粒下有生字係是年
七月庚申事 按以地理志考之京兆府有鄠縣無鄂縣當從

御覽

二年

永泰二年夏賜安南節婦金氏兩丁侍養金氏本賊帥陶齊亮之母以忠義訓齊亮不受遂絕齊亮自績而衣自田而食州里稱之乃詔本道使每季給銀二兩充衣服以終其身

御覽八百二十六 冊府一百三十九遂絕齊亮作遂與齊亮絕乃作仍充作并係是年六月事

大歷八年

大歷八年夏四月乾陵上仙觀三尊殿有雙鵲銜柴及泥補葺殿之隙壞凡一十五處宰臣等上賀曰臣聞孝至於天則祥發陵邑德被於物則化及鳥獸伏惟陛下因心廣教宏道極和時殷霜露之恩流行雲雨之澤故前聖垂裕歆於明誠皇天報貺錫以嘉應

異鵲來感翔集可窺跡比人謀事歸神化望宣示中外編諸史冊
御覽九百二十一 冊府二十五雙作兩噪作隙無宰臣以下
九十二字係大歷三年事又三十七亦作三年夏四月戊申載
有宰臣賀文三尊作天尊時殷作時因餘與御覽同下並載有
帝答手詔 按代宗紀大歷八年四月戊申乾陵上仙觀之尊
殿有雙鵲銜紫泥補殿之隙缺凡十五處此條宰臣以下疑卽
其處佚文五行志紫泥作泥及柴隙缺作巢壞餘與代宗紀同
代宗時渤海質子盜袞龍服捕得之詞云慕中國衣服上赦之
御覽六百九十 冊府四十一袞龍服作修袞龍捕得作擒國
衣服作華文物上赦之作帝矜而捨之係大歷八年閏十一月
事

九年

大歷九年七月久旱是日澍雨豐霽初京兆尹黎幹以旱故祈雨於朱雀街造土龍悉召城中巫覡更舞觀者駭笑

御覽七百三十五 案代宗紀是年秋七月甲辰月掩房又入羽林久旱京兆尹黎幹歷禱諸祠未雨又請禱文宣廟上曰邱之禱久矣疑此條卽其上之佚文冊府六百九十七敘此事亦在九年七月朱雀下有門字巫覡下有舞於龍所幹與巫覡八字卽有彌月不雨幹又請禱文宣廟俄而澍雨豐霽云云

十二年

代宗十二年成都府人郭遠因樵爨獲瑞木一莖有文曰天下太平獻之以示百官宰臣奏賀曰至德之化先賁草木太平之符遂形文字伏望藏於祕閣宣付史館

御覽九百五十二 冊府二十五獻之上有四字二字官作寮

臣下有等字至上有頃者賊臣兇狡敢蔽聰明陛下以時發覺
成就誅放與人更始在物維新浹辰之間果獲佳應三十六字
先作光符作時館下有從之二字係大歷十二年五月甲子事
案五行志云大歷十二年五月甲子成都府人郭遠因樵獲
瑞木一莖有文曰天下太平四字與此條事同文異故知此條
乃代宗紀逸文

年月無考

大歷中太原府清源縣人韓景輝養冬蠶成繭詔給復終身

御覽八百二十五

代宗性仁恕言事者諫曰陛下爲政傷於太寬朝典由是不肅上
笑而荅曰今時運艱難凡人臣事朕者窺少祿利耳今府庫空竭
無俸入俾之優但峻刑科是君上有威無恩朕所不忍行也

御覽六百二十六

舊唐書逸文卷三終

姪
男
銓
校
葉

舊唐書逸文卷四

甘泉岑建功碑

德宗紀上

建中元年

建中元年詔山南之枇杷江南之柑橘藕歲爲次第貢者取一次以供廟饗餘皆罷

御覽九百七十一 案德宗紀大曆十四年閏五月戊寅詔山南枇杷江南柑橘歲一貢以供宗廟餘貢皆停與此條事同而年異疑前後兩年皆有此詔今姑存之

二年

開元十九年始於兩京置齊太公廟以張良配上元初特加封太公爲武成王以歷代名將從其祀然有其制而未之行祠宇日荒

至是宰臣盧杞京兆尹盧諶以盧者齊之裔乃鳩其裔孫若盧崔
丁呂之族合錢以崇飾之請復舊典兼擇自古名將如孔門十哲
皆配饗詔下史官乃定張良穰苴孫武吳起樂毅白起韓信諸葛
亮李靖勣配焉

御覽五百三十五 冊府三十四開上有有司奏定張良穰苴
孫武吳起樂毅白起韓信諸葛亮李靖李勣配武成王廟先是
三十二字上元初作乾元中特加作追太上有齊字以歷代作
令選歷代從下有其字然下無有其制而四字臣作相請下無
復舊典兼四字張良至配焉作穰苴等至是始奏定焉係建中
二年五月事

貞元二年

李希烈既平淮西節度使陳仙奇進錢一文大小如開通之狀文

曰天下太平云於希烈庭中得之命宰臣召百寮遍示之

御覽八百三十六 案以新舊書德宗紀及通鑑考之仙奇之殺希烈在貞元二年四月其爲吳少誠所殺在是年七月此事當在四月以後七月以前

貞元二年神策將溫嘉順得白玉印其文曰天子之寶獻之卽傳國八寶之一上幸奉天後失之及是方獲

御覽六百八十二 案此條無月日可考今列於是年之末

三年

貞元初德宗以奉先縣令鄭珣瑜爲饒州刺史昭應縣令韋武爲遂州刺史華原縣令崔琮爲汝州刺史藍田縣令韋貞伯爲舒州刺史盤屋令李曾爲郢州刺史錄善政也各賜馬一疋并綵物衣服以遣之

御覽二百五十五 案盤屋下亦當有縣字方與上文一例冊
府七百一載此事作貞元三年事同而文畧異汝州作歙州令
上俱無縣字

德宗紀下

四年

初涇原節度使劉昌之領涇州也平涼盟會所亡歿將士骸骨在
焉乃令聚而坎瘞之因感夢於昌有媿謝之意遂以聞由是下詔
深自剋責乃遣秘書少監孔述睿及中宮以御厨饌物及內造衣
服數百襲令劉昌收其骸骨以歸大將三十人將士一百人皆具
棺攢斂以衣服葬於淺水原置二塚其大將曰旌義塚將士曰懷
忠塚詔翰林學士撰二塚誌文及祭文其日劉昌盛陳兵於葬所
具牢饌祖祭之禮昌及大將皆素服臨之焚其屍及紙錢千幅又

立三堠題以塚名表於道傍師人觀之莫不感泣

御覽五百五十五 案宮當作官 又案德宗紀貞元四年庚

午

庚午上脫去月名
沈本繫諸三月

詔涇原劉昌於平涼會盟所收被害將士

骸骨葬於淺水原爲二冢立石堠志之題曰懷忠冢此條當是
彼處逸文 又案劉昌傳亦載此事與此條事同而文異故定
爲德宗紀逸文

貞元四年夏右神策軍獻瑞瓜三蔓各爲一蒂而生三瓜

御覽九百七十八 冊府二十五夏作七月各作合事類賦注
二十七各亦作合

貞元初江西都團練使李廉奏建中四年鄂州刺史逆賊李希烈
之將董待名率衆襲鄂州順風縱火邑屋將焚臣乃禱於城隍神
倏忽風迴火烈賊潰遂擊破之連黃沔三州請付史官以荅神意

從之

御覽三百二十九 冊府三百九十八貞元初作貞元四年江西上有爲字廉作兼鄂州刺史上有臣任二字董待名作童侍召連下有拔字三作二 案此條月日無考今列於是年之末六年

貞元六年正月戊戌朔先是有司奏元日太陽虧遂罷朝會至時不食百僚稱賀

御覽二十九 案舊書本紀之例正月朔雖無事亦必書其甲子重歲首也德宗本紀但有貞元六年春正月戊辰朔十字無先是以下二十二字而戊辰戊戌又復不同今考本紀下文云戊申大雪二月戊辰朔上文五年十二月又有庚午辛未壬申三日則正月朔必係戊戌斷非戊辰可知會要四十二所載與

御覽同是其明證冊府一百七所引戊戌作癸卯亦誤朔下有
不視朝三字太陽虧作日有食之罷作停至作及稱作皆 又
案天文志云貞元六年正月戊戌朔有司奏合蝕不蝕百寮稱
賀與此條事同文異然亦作戊戌更足正本紀戊辰之誤

貞元六年二月戊辰朔中和節百寮宴於曲江亭上賦詩賜之曰
東春變梅柳萬寓生春光中和紀月令方與天地長耽樂豈予尙
懿茲時景良庶遂亭育恩同致寰海康君臣永終始交泰符陰陽
曲沼水新碧華林桃稍芳勝賞信多歡戒之在無荒

御覽五百九十二 案德宗紀云貞元六年二月戊辰朔百寮
會宴於曲江亭上賦中和節羣臣賜宴七韻而未載其詩此條
蓋卽彼處逸文

貞元六年春三月庚子百寮宴於曲江亭上賦詩以賜之曰歲閏

節華晚衆芳繁暮春霽日天地晴元已風景新
禊飲傳舊俗古今歡此辰至樂在同和絲竹奚
所陳薰琴是賞心姑射可疑神不可尙
航緬浮觴曲水濱

御覽五百九十二 冊府四十年下無春字上作帝詩未載

案德宗紀云貞元六年三月庚子百寮宴于曲江亭上賦上已詩一篇賜之亦未載其詩此條蓋卽彼處逸文

七年

貞元七年冬司農卿李模免官初司農當供三官冬菜二十車以度支給車直稍賤又阻雨菜敗模以度支爲辭上責其不先聞故免之先是模奏司農菜不足請京兆府市之尹薛珣萬年令韋彤乃禁人私賣上命奪珣俸一月彤俸三月

御覽九百七十六 會要六十六免上有有罪二字三官作三

宮十作千兩下有不時二字敗上有多傷二字間下有奏字先是作於是兆下無府字尹上有京兆二字乃禁人作禁有菜者命作令係是年十月事冊府五十八冬亦作十月三官亦作三宮二十作三千兩上字俱作帝私作科

九年

貞元九年春正月庚辰朔上御含元殿受朝賀禮畢上賦退朝觀軍仗歸營詩以示宰臣曰獻歲視元朔萬邦咸在廷端旒揖羣后迴輦閱師貞分行左右出轉旆風雲生眷此戎旅節載嘉良士誠順時頒宴賞亦以助文經

御覽五百九十二 冊府四十兩上字俱作帝宰臣下有等字詩未載 案德宗紀云貞元九年春正月庚辰朔朝賀畢上賦退朝觀仗歸營詩亦未載其詩蓋卽彼處逸文

左右神策鹽州行營節度使胡堅昌表奏初城鹽州鹵中獲壤土
又置烽堡水路迴遠卽時有兩廢鹽井悉生鹽事符聖德可謂天
讚請宣付史館制可

御覽八百六十五 冊府二十五左下無右字昌上有右神策
鹽州行營節度使張十一字表上有皆字壤作懷迴作迴讚作
贊制下有曰字係貞元九年五月辛卯事全唐文五百二十六
亦作胡堅貞元九年爲左神策鹽州行營節度使奏文與冊府
同惟迴仍作迴付上無宣字

十年

貞元十年正月西川奏當管甘露降松栢竹叢等二千四百四十
二處

御覽八百七十二 會要二十八柏下有樹字叢作叢

貞元十年同州獻五色雁

御覽九百十七 冊府二十五同係十一年二月事會要二十八獻作進亦係十一年二月事今姑從御覽列於十年

貞元十年秋九月戊子以重陽日宴餞賜百寮近臣初九日以雨罷宴及是方會宴上賦詩以賜百官曰雨霽霜氣肅天高雲日明繁林已墜葉寒菊仍舒榮懿此秋節晚更延遐賞情池臺列廣宴絲竹轉新聲至樂非外獎浹歡同中誠庶敦朝野意永使風化清御覽五百九十二 冊府四十年下無秋字戊子作十日無餞字近臣作追賞上作帝詩未載 案德宗紀云貞元十年九月戊子賜百寮九日宴上賦詩賜之亦未載其詩此條蓋卽彼處逸文

十一年

德宗以左諫議大夫史館修撰張薦爲秘書少監修撰如故時裴延齡貴欲異同宰府乃言於上曰諫議大夫論朝廷得失之官史館修撰書朝廷得失之事則領史職者不宜爲諫官故有斯命

御覽二百三十三 案張薦傳所載與此條事同文異在貞元十一年德宗紀貞元十一年五月庚寅遣使冊九姓迴紇可汗據通鑑使者卽祕書監張薦與薦傳所紀官階正合則此條所言必五月以前之事

德宗命王虔休幕客昭義軍節度掌書記盧頊爲洛州別駕知州事賜緋魚袋賞有功也時元誼據洛州頊白於虔休請入城說下之頊見誼爲陳利害誼請隨頊歸朝故頊不次授官

御覽二百六十三 案新書王虔休傳云遣掌書記盧頊入見誼陳利害誼請朝卽以頊爲洛州別駕使守洛誼出亦奔魏舊

書德宗紀貞元十二年正月庚子元誼李文通率洛州兵五千民五萬家東奔田緒據此則頊知洛州之命當在十一年之冬冊府一百六十五無德宗以下八字節度下有使字書記下有試祕書郎四字白於下有節度王三字授官下有誼亦不赴京師六字係十一年九月事

十二年

貞元十二年以前太子賓客李愿爲左領軍大將軍李憑爲右威衛大將軍依前兼中丞皆太尉晟之子以免喪故晟諸子同日授官者凡九人

御覽二百三十九 冊府一百三十一所引全同惟二作一年下有十一月辛亥五字今考新舊書本紀及李晟傳晟之薨在貞元九年八月庚戌至十一年十一月辛亥正其諸子免喪之

時御覽之二字必一字之訛當據冊府改正今姑仍御覽原文
貞元十二年上以聽政之餘深思理本迺著刑政箴并序序曰朕
以南面勵精理道雖極和平之際未臻元古之風夙夜孜孜勤求
不怠夫安人以政輔政以刑蓋爲之立中非使人從欲也是以務
兼聽以酌羣臣擇庶官以資共理恒勉不足而遏其過我欲仁矣
尙逮夫義哉然萬務是殷必戒其失聽政之暇常志所有聊綴斯
文庶乎自儆爾大朴旣散利欲是生惟辟御時建極作程導以仁
政齊以典刑惠此下人致之和乎政伊何必循道德詳刑伊何
必去煩刻不以人從欲不以枉傷直故百度惟貞萬方作式匪陽
不生匪陰不成寬則致慢猛亦取怨酌于大猷戒厥偏見罔拂人
志罔興人患邇言必察芻蕘必詢奉無私之心以誠其意廣無情
之聽以得其真喜怒有節措置有倫是以令肅如秋化行如春無

邇儉人無信側言儉人則敗政側言乃惑聽罔攻異端慎乃出令
知人不易在觀其行事實求理法乃因時法非生弊聖哲不爲道
物類之情以通其變相天地之道咸盡其宜教必明於順動必慮
於違是以天覆之德日用不知六馬並馳在鈞御策五音並奏在
理金石苟去僞邪可行蠻貊因人而理自古不易唐堯赭服夏禹
泣辜以弼於理冀遷其愚甯漏吞舟豈求噬膚陷之於過是曰毒
痛天監孔明無臭無聲罔載爾僞必先爾誠蟻壤不防太山可傾
患生所急禍起所輕故作事謀始而戒於未形予臨兆人道存化
育祇荷元貺幸清九服一夫不獲若履深谷思正其源庶登於樸
監于往躅書以自勗

御覽五百九十二 冊府四十亦作十二年下無上字聽政
作政聽誤序箴並未載全唐文五十五雖極作雖及際作濟以

政作以正羣臣作羣情夫義作夫意所有作所存以得作思得
道物作導物鈎御作鈎銜僞邪作回邪所急作所忽 案德宗
紀云貞元十二年十二月上著刑政箴一首而未載其箴此條
蓋彼處逸文

十三年

貞元十三年韓譚進統載三十卷其書採虞夏以來至於周隋錄
其事跡善于始終者六百六十八人爲立傳

御覽六百一 會要三十六節引此條十三作十二年下有二
月二字韓上有夏州節度使五字譚作潭三十作四十 案德
宗紀貞元十二年五月有銀夏節度使韓潭事當以潭字爲是
冊府五百五十六貞元上有韓潭爲夏綏銀節度使德宗十一
字年下無韓字譚並作潭

十四年

貞元十四年南天竺國進花嚴經殘梵夾令僧般若三藏於保壽寺僧智柔圓照同於崇福寺翻譯成四十卷

御覽六百五十七 冊府五十二進上有先字花作華殘作殊夾作本無令字於作領到令照作炤下有道監虛舟智通等十八人十字係是年正月事

貞元十四年九月中書門下奏賀嵯峨山獲白鶴

御覽九百二十六 冊府二十五九月下有丁未朔二字嵯峨作峨嵯無山字

十六年

貞元十六年以山人崔莘爲右贊善大夫充太子侍直新名也

御覽二百四十六 冊府九十八云貞元十六年五月徵茅山

山人崔芊召對於延英殿賜緋魚袋疑其授官卽在是時 案
舊書韋渠牟傳云茅山處士崔芊徵至闕下新書韋渠牟傳云
召崔芊于茅山與冊府所言正合蓋卽其人也

十七年

貞元中上賜羣臣會宴於曲江上令中使劉希昂宣慰上賜詩曰
令節晚澄霽四郊烟靄空天清白露潔菊散黃金叢寡德荷元貺
順時休百工綺筵歌鍾樂思與君臣同至化在亭育相成資始終
未知康衢詠所仰惟年豐

御覽五百九十二 冊府四十賜上無上字宴上無會字上令
作上命上賜詩作帝賜詩係十七年九月重陽節事詩未載

案德宗紀貞元十七年九月戊辰羣臣宴曲江上賦九日賜宴
曲江亭詩六韻賜之亦未載其詩此條蓋卽彼處逸文

十八年

貞元十八年九月賜宰臣及中書門下兩省官宴於故馬璘池亭
御製豐年多慶九日示懷詩以賜羣臣曰爽氣肅時令早衣聞朔
鴻重陽有佳節具物欣年豐皎潔暮潭色芬敷新菊叢芳樽滿衢
室繁吹凝烟空惠洽信吾道保和惟爾同推誠致元化天下期爲
公

御覽五百九十二 冊府四十九月下重陽節三字無賜宰
臣以下十八字九日示懷日作月誤詩未載 按德宗紀貞元
十八年九月癸亥賜羣臣宴於馬璘山池上賦九日賜宴詩六
韻賜之亦未載其詩此條蓋卽彼處逸文

憲宗紀上

元和二年

元和中京兆尹李鄘奏三原高陵涇陽興平等四縣共管烽二十八所每年差烽子烽師九百七十五人今遠近無虞畿內烽燧請停從之

御覽三百三十五 按新舊書鄘傳皆言再爲京兆尹據舊書憲宗紀其由御史中丞爲京兆尹在永貞元年十月甲寅其由京兆尹爲尙書右丞在元和元年二月戊戌其由尙書右丞復爲京兆尹卽在元和元年八月丙戌其由京兆尹爲鳳翔尹在元和二年六月辛巳會要七十二共作兵無烽師二字九百上有計字脫今字係元和二年正月事

三年

郝玼爲刺史始玼以臨涇地宜當畜息蕃戎每爲寇卽屯其地嘗自其帥願以城控之前帥不從其後段祐爲節度使玼復白祐祐

多其策乃表請城之故詔玼鎮其地自是西戎無敢犯涇者玼自行間前無強敵在邊上三十年生得蕃人輒割剔而歸其屍蕃人畏之如神下令得玼者賞以等身金蕃中小兒啼號者但連呼郝玼以怖之

徇覽二百七十九 按冊府四百二十九所載事同而文畧異玼作玼臨涇作臨洮段祐作段佐云在憲宗元和初據郝玼傳玼爲刺史在元和三年祐亦作佐冊府涇作洮誤憲宗紀元和三年十二月庚戌以臨涇爲行原命鎮將郝玼爲刺史自玼鎮臨涇西戎不敢犯塞則御覽所引似卽其處之佚文

四年

御史臺奏準舊例監察御史從下六人各察尙書省一司又準興元元年十月勅令監察從上第一人察吏部禮部第二人察兵部

工部第三人察戶部刑部第四人者伏以監察第一第二人已充監察及館驛等使新人除出使外並無以觀其能否今請守舊制新人分察從之

御覽二百二十七 冊府五百十六刑部下無第四人三字並下有無職掌三字並作竝係元和四年五月事會要六十同惟六人上有第字勅令監察下有御史二字無第四人者四字已充監察下亦有御史二字新人下無除字並下與冊府同舊制下有以字會要六十引興元二年十月四日勅刑部下每年終議其殿最七字亦無第四人者四字

憲宗以天下無事畱意政典每覽前代興亡得失之事皆三復其言又讀貞觀開元實錄見太宗撰金鏡書及帝範上下篇元宗撰開元訓誠思繼前躅遂採尙書春秋傳史記班范漢書三國志晉

書晏子春秋吳越春秋新序說苑等書君臣行事可爲龜鑑者集成十四篇一曰君臣道合二曰辨邪正三曰戒權倖四曰戒微行五曰任賢臣六曰納忠諫七曰慎征伐八曰戒刑法九曰去奢泰十曰崇節儉十一曰獎忠直十二曰備德政十三曰諫畋獵十四曰錄勳賢分爲上下卷上自製其目曰前代君臣事迹至是以其書寫於屏風列之御座之右復遣中使程文幹以書屏六扇至中書宣示宰相李藩裴垍曰朕近撰此屏風常所觀覽故令題將示卿藩等上表稱賀

御覽五百九十二 冊府四十憲宗作帝政典作典墳春秋下有後字無吳越春秋四字鑑作鏡戒刑作慎刑備德作修德帝自作上自宰臣作宰相常作嘗係元和四年九月事 按御覽自又讀以下另自提行而文義實相連貫冊府合爲一條今從

之 又按憲宗紀元和四年秋七月乙巳朔御製前代君臣事迹十四篇書於六扇屏風是月出書屏以示宰臣李藩等表謝之此條蓋卽彼處逸文冊府之九月蓋七月之誤

五年

元和中御史中丞王播奏監察御史舊例在任二十五月轉準具員不加今請仍舊例在任十三月轉準具員加至十八月今請減至十五月侍御史舊例在任六月轉準具員加十三月今請至十月從之

御覽二百二十六 會要六十仍舊下有殿中侍御史舊六字六作十加下有至字至十月上有減字係元和五年二月事冊府五百十六亦作五年二月仍舊下亦有殿中侍御史舊六字無加至十八月以下廿五字今請作今後減從之下有播爲中

丞振舉朝章百職修舉十二字 案憲宗紀元和五年三月乙巳以兵部侍郎王播爲御史中丞十月戊辰朔以京兆尹許孟容爲兵部侍郎以中丞王播代孟容又以呂元膺代播據此則播奏是事必在五年惟二月疑三月之誤

李絳面論吐突承瓘用兵無功合從顯責又論承瓘於軍中立聖政碑事不可許上初怒色變絳語不已詞旨懇切因泣下上察其意乃大開悟拜絳爲中書舍人卽命曳去所立碑曰微絳言吾不知爲損又面賜絳紫袍爲絳擇笏以賜之因謂之曰爾它時勿易此心

御覽六百九十二 冊府一百一李上有翰林學士司勳郎中知制誥十一字兩瓘字皆作瓘從作加又下無論字事作非舊制上初怒作帝初甚怒語上有前字察上有徐字意下有直色

稍和四字乃作卒拜作遂以人下有學士如前四字卽命作亟
命軍中吾不知爲損作不知此爲損我又上有翼日二字紫袍
至此心作紫衣金魚親爲絳擇良笏勉之曰爾他時在南面無
易此心係元和五年事 按通鑑叙絳爲中書舍人事在是年
十二月己丑 又按李絳傳叙此事亦在元和五年與此條事
同而文異今定爲憲宗紀逸文

憲宗紀下

七年

元和中延英宰臣對訖左拾遺楊歸厚次請對時上坐久宣令後
坐日對來歸厚堅辭固請宰相諭之不退上乃召見歸厚首論中
官許遂振次歷詆宰輔皆過激切然而自衍求試其詞甚繁逾刻
而罷

御覽二百二十三 按憲宗紀元和七年十二月丙辰左拾遺
楊歸厚以自娶婦進狀借禮會院貶國子主簿分司通鑑元和
五年七月載有嶺南監軍許遂振以飛語毀節度使楊於陵一
事以是推之此事當在五年七月以後七年十二月以前冊府
四百八十一時上作時憲宗上乃作帝乃在七年八月己丑是
八年

元和中鹽鐵使王播進陳許軍琵琶溝運圖先是中官李仲秀奉
命視之還言可以通漕至鄆城下北潁口水運千里而近及上覽
圖詔韓宏發卒以通汴河於是船勝三百石皆入潁

御覽三百三十二 冊府四百九十七進下有供字許下無軍
字溝下有年三二字鄆作堰上作帝石下有者字皆下有得字
係元和八年十二月事

九年

憲宗時每歲冬以鷹犬出近畿習狩謂之外按宣徽院供奉官爲其使領徒數百恃恩恣橫郡邑懼擾皆厚禮迎犒之恣其所便止舍私瞞百姓畏之如寇盜

御覽九百二十六 案裴度傳叙此事在元和九年十月度改御史中丞以後與此條事同文異今定爲憲宗紀逸文 又案冊府五百四十六每上有先是五坊小使六字領下脫徒字恃上有或有二字懼作驚盜下有每畱旬月方更其所八字事在元和九年冬又一百一畧同徒下有衆字事在九年十二月

十年

元和十年王師討淮西鎮州節度使王承宗淄青節度李師道謀撓王師遣刺客於京城殺宰相武元衡憲宗怒命御史中丞裴度

爲宰相專主兵機以誅三盜時淮西鎮冀兩道用軍度支儲運供餉不暇復又諸軍玩寇陰與賊通冀朝廷力竭卽行赦雪議者患之宰相韋貫之奏曰陛下豈不知建中之事乎天下兵始於蔡急魏應齊趙同惡德宗率天下兵令馬燧李抱真急擊之物力旣屈朱泚乘間爲亂朱滔南向指關致使梁漢爲府奉天有行皆陛下出所聞見非他也不能忍待次第逮於滅賊故也陛下獨不能寬歲月之計俟拔蔡而圍鎮耶上深然之而已下詔矣後擒元濟而承宗服果如貫之所籌

御覽二百九十一 案通鑑載命討王承宗及韋貫之語在元和十一年正月今姑從御覽韋貫之傳叙此事後半與此條約同而前半迥異故定爲憲宗紀逸文 又案出所聞見出字文義難通韋貫之傳無之必是衍文

十一年

元和中昭義節度郗士美以賊首三百來獻詔梟於通化門外
御覽三百二十七 案通鑑元和十一年二月八月郗士美兩
敗王承宗獻首事當在是年冊府四百三十四昭義下有軍字
節度下有使字以下有進討鎮州王承宗所獲九字門下有二
百二字係元和十一年二月事

元和十二年憲宗召宰臣議兵曰王師伐蔡首尾三年雖捷奏頻
來窠巢未殄度支供饋其何以濟李逢吉崔羣王涯各有奏對多
言罷兵爲便唯裴度不言利害議曰臣請身自往行營督戰明日
延英復對宰臣俱退上獨止度謂之曰卿必能爲朕行乎度頓首
流涕而奏曰臣誓不與此賊俱全上亦爲之感慟度奏曰賊已力
困但以羣帥不一故未降耳上深嘉之遂欲加度招討使度奏曰

韓宏已爲都統臣不欲受招討之名但奉使卽得乃下詔以度爲彰義軍節度蔡申光觀察等使仍准四行營宣慰處置使其年八月一日度發京師仍賜禁軍三百爲衛兵憲宗御通化門餞軍度銜涕辭去以圓城爲蔡州度傳上慰勞之旨躬督戰陣卒以立功卽時論賞諸將奮勵無敢退畱至十月十一日拔蔡州擒吳元濟仗節而還

御覽二百七十七 案憲宗紀元和十一年八月戊午朔庚申裴度發赴行營敕神策軍三百人衛從上御通化門勞遣之度望門再拜銜涕而辭上賜之犀帶此條追叙前此之謀猷後此之勳績以申明其事當列彼處之下 又案裴度傳所載與此條迥別故定爲憲宗紀逸文

徐泗節度李愿奏請換戟有司以官戟五年一換私家不在易限

詔以李晟忠勳之家特許之

御覽六百八十一 會要三十二叙此事在元和十一年十月
十二年

元和十二年諫議大夫韋綬皇太子侍讀綬好諧戲兼通小說太子因侍上或以綬所能言之上謂宰臣曰侍讀者當以經術輔導太子使深知君臣父子之教令或聞綬之談論有異於是豈所以導太子者因命罷其職

御覽二百四十七 案冊府七百十五皇上有充字小上有人間二字因侍下脫上字能作譚上謂上有他日二字君上有其字令作今豈下無所以二字職下有尋又出之四字事在元和中未言年月通鑑叙此事在元和十二年閏五月丁未 又案韋綬傳叙此事與此條事同文異故定爲憲宗紀逸文

元和中淮南節度使馬摠進吳元濟旌旗七百三十九事

御覽三百四十 案憲宗紀及摠傳摠曾節度淮西未曾節度淮南且吳元濟亦在淮西不在淮南南字必是西字之誤據憲宗紀及通鑑摠之由蔡州畱後授淮西節度使在元和十二年十二月壬戌其由淮西節度使授忠武節度使在十三年五月丙申御覽雖無年月然其事當在元濟初平之後元濟之平在十二年十月摠之進旌旗疑卽在是年十二月

十三年

元和中賜太子賓客于頔諡曰思初有司諡曰厲至是特易之右丞張正甫封其勅請還本諡補闕高鉞上疏曰夫諡者所以懲惡勸善激濁揚清使忠臣義士知勸亂臣賊子畏罪孔子修春秋亂臣賊子懼蓋爲此也垂範如此尙不能救況又隳其典法乎

御覽五百六十八 全唐文七百二十五載此疏全文鉞作鉞
畏罪作知懼爲此作謂此尙作而 按冊府五百九十六亦載
此疏全文御覽係節引于頤傳全載此疏尙亦作而在元和十
三年八月與此條事同文異故定爲憲宗紀逸文 又案新舊
書高鉞傳未載其疏新書于頤傳叙其事亦作高鉞

憲宗元和中
有五坊使犯法上將宥之裴度懇論不已時方征鄆
冀上曰五坊是小事今日與卿要商量用兵度奏曰山東叛逆不
過亂數州五坊使橫暴將亂輦下上怒起入見諸中人曰使我羞
見宰相遂殺五坊使京師肅然天下望風而理

御覽四百五十四 案通鑑此事在元和十三年九月 又案
裴度傳所載與此條事同文異故定爲憲宗紀逸文

舊驅儼振子等金吾將軍並具欄笏引入閣門謹按大儼者所以

雖除羣屬合資威武盛其光儀彌芴之制常參朝服舊制未稱合請各依鋪繡具帑袜帶儀力部引出入

御覽五百三十 會要七十一舊上有左右金吾引駕仗奏以九字舊下有例字軍下有以下二字閣作閣其上脫盛字合作今後鋪作錦帑作巾力作刀入下有則與事合宜從之七字係元和十三年十二月事

十四年

元和十四年齊魯初平宴文武百寮裴度舉觴獻壽跪而言曰陛下德配天地明並日月神武獨斷寇逆削平錫宴羣臣當茲令節臣備位台司幸逢昌運願與四海九州之人同上千萬歲壽上執酒爲飲之

御覽五百三十九 冊府一百十一齊魯上有以字百寮下有

于麟德殿宰臣六字度下有等字錫作賜臣下亦有等字上作
帝飲之下有因擊鞠爲戲羣臣縱觀旣罷賜繪綵有差十六字
係是年三月乙酉事 案憲宗紀三月己卯朔乙酉上以齊魯
初平宴羣臣於麟德殿賜物有差此條蓋卽彼處逸文

元和十四年涇原節度使王潛進銀三千兩熟線綾三千疋涇州
密邇戎境其土無百姓其軍皆仰給度支舊矣主若無名上獻雖
吳蜀沃富猶謂取諸人以干媚不免於譏責今則盜削軍實以充
貢獻而求恩澤蓋以時急於利勢使然也

御覽八百十二 冊府一百六十九線作絹三千疋作五千疋
主作至猶下脫謂字利作財係是年五月事

元和十四年十月上欲以潮州刺史韓愈爲袁州刺史愈至潮州
獻上表上對宰臣曰昨日韓愈表因思當時所論佛骨大是愛我

我豈不知然爲人臣不當言人主事佛乃年促也我以是惡之時上深欲擢用愈候宰臣啟之耳皇甫鏐嫉愈乃曰終是狂疎且與移一郡故有是命

御覽二百五十五 案韓愈傳所載與此條事同文異故定爲憲宗紀逸文 又案據愈傳昨日下午當補得字

年月無考

憲宗時莊宅使許遂振得玉類珽以進上悅命賜絹三百疋御覽八百五

憲宗時隰州刺史吳暈獻玉杯一頗珍奇云先使吐蕃所得

御覽八百五

舊唐書逸文卷四終

姪
男
校
葉